



10. maj 2024

UPA2024/35

Uunga siunnersuut: Aalisarneq pillugu Inatsisartut inatsisaat

(Aalisarnermut Piniarnermullu Naalakkersuisoq)

(Oqaatsit atorneqartut atuupput.)

Aalisarnermut inatsisissatut siunnersuut maanna aappassaaneerneqarnerani Siumut sinnerlugu imaattumik oqaaseqaateqassaanga.

Siullermik maani Inatsisartuni siullermeerneqarnerata kingorna Aalisarnermut Ataatsimiititaliami suliarineqarneranut ataatsimiititaliamut ilaasortanut minnerunngitsumillu suleqataasimasorpassuarnut qujarusuppunga. Aamma aggersarneqarlutik ataatsimiititaliamiilluunniit orninneqarlutik immersuisimasorpassuarnut qamannga pisumik Siumut qujassuteqarumavoq.

Periarfissaq manna iluatsillugu inuiaqatigiinnut aamma Siumukkormioqatitsinnut ersarissumik oqaatigissavarput. Aalisarnermut Inatsisissatut siunnersuut una Siumup tunngaviusumik anguniagaanut aammalu Siumup ataatsimeersuarnermi naqissusigai tunngavigeqqissaarlugit sulineq ingerlanikuummat. Taamaattumik Siumup anguniakkani, tassalu inuiaat kalaallit pisuussutiminnik piginnittuulernissaat aammalu taakkua atorluarneqarnerisigut annerusumik iluaqussiiffigineqarnissaat pilermat. Inuit ataasiakkaat imaluunniit selskabit ataasiakkaat kisimik inuiaqatigiit pisuussutaannik piginnittutut inissismajunnaarsinnissaat, tassa inuussutissarsiortorpassuarnut siammaanissaq aqqutissiuullugu aaqqissusseqqinnissaq pilermat.

Aalisarnermut inatsisissatut siunnersuut siullermeerneqarneraniit tunngaviusumik allangngorsimanngitsoq Siumut isumaqarpoq. Inatsisissami tunaartarineqartut makkuussut pingarnerillu suli attanneqarmata Siumup iluarismaarpaa:

- Pisuussutit inuiaqatigiit pigisarigaat
- Kalaallit pisuussutiminnik tamakkiisumik piginnittuullutillu aqutsisunngussasut - soorunami
- Pisassiissutit amerlavallaat ataasiakkaanit tigummineqassanngitsut
- Pisassiisarneq pillugu aqtsineq qinikkanit iperarneqassanngitsoq



- Piffissap ingerlanerani kinguaasatsinnuttaaq atasinnaasumik aalisarnerup ingerlanneqarnissaa
- Aalisarneq aningaasarsiornikkut attassisinnaassuseqassasoq ineriartorsinnaassasorlu, aamma nutaaliornissamut
- Ingerlatsiviit ulluinnarni ingerlanneqarnerinut piffissaatinngu politikikkut akuliuttoqartassanngitsoq
- Aalisarneq pillugu ataavartumik paassisutissanik katersinissaq pisortallu ingerlatsinerani ammasumik pissuseqarnissaq
- Pisassiissutit inunnut suliffeqarfinnullu ataasiakkaanut qaqugorsuarmut pigiliunneqarsinnaassanngitsut
- Aalisagaqarfiulluartuni, siullermik aqutsiveqarfimmi 47-mi, aalisartut piumasut PNNP-mut (pisassiissutinik niuerutigineqarsinnaasut nammineq pigisat) ikaarsaariarsinnaanngussasut taamalu aningaasarsiornermikkut namminiussuseqarlutik tigussaasumik ineriartorsinnaanngussasut
- Pisassiissutit atukkiunneqartut amerlassusaat erseqqissumik qummut killilersorneqassasut, aamma toqqaannanngikkaluamik pisassiissutinik pigisaqarsinnaaneq aqunneqalissasoq
- Sinerissap qanittuani aalisariutinik nutarsaanissamut,aammalu inuuusuttut aalisarnermut pularusuttut immikkut isigineqarlutik qulakkeerinniffigineqarnissaat. Aningaasalersuinermi Naalakkersuisuniit qularnaviikkusiinissamut qulakkeerinnittoqassasoq.
- Nunami tunitsivinni sulisartut suliffeqartuaannarnissaannik qulakkeerinniffigineqassasut.

Inatsisartuni siunnersuutip siullermeerneqarnerani ilaatigut oqariartuutigaarpuit, pingaartilluinnaripput Kalaallit Nunaanni aalisakkanik isumalluutit tamakkiisumik inuiaqatigiiit ataatsimut piginnittuuffigissagaat. Aamma tamatumunnga peqatigitillugu kalaallinut annertunerpaamik iluanaarutaanissaa qulakkeerneqassasoq peqatigisaanillu aalisarnermik inuussutissarsiummi tunngaviusumik piumasaqaatit ataqtigiissut patajaatsullu pilersinneqassasut. Immami pisuussutitta nunatsinnut aningaasariutigineqarnerulernissaat aqqutissiuutissallugu suliassatsinnut avaqqunneqarsinnaanani ilaalluinnartoq qitiulluinnartorlu Siumut isumaqarpoq. Aalisarneq iluaqtsiullugu aningaasarsiornitta uatsinnut kalaallinut aningaasarsiornikkut iluaqtaanerujartuinnartumik ingerlatsiffiunissaa aqqutissiuutissallugu pingaaruteqarpoq piffissanngorlunilu Aalisarnermut inatsisip aaqqiiviginissaa, nunarput inuili pillugit.

Aalisarnermut inatsisissatut siunnersuut ataatsimut isigalugu arlalippassuartigut sungiutiinnarlugu ingerlatsisimanitsinnut illuatungiliillunilu unitsitsiartulertussaassaaq. Kalaallit aalisartut piumasut nunarsuarmi niuerfinnut appakaanissaat periarfissiissutigineqarnerulluni ammaaneqassaaq.



Sinerissap qanittuani aalisartoq ima inisisimajunnaassaaq, suliffeqarfuit allat iluaqtiginiagassaanik naleqarnerulersitassaanillu nunamut tunisiartuinnartartussatut. Nammieq niuernermik tamakkiisumik ingerlatsisinnaanngornissaq periarfissaalissaq, piumagaanni.

Siumumit upperaарput aalisartut nutaaliornissaminntu piumassuseqartut, taamaammallu aningaasarsiornermikkut ilorraap tungaanut patajaatsumik aallarsinnaassasut qularutiginngilluinnarpaput.

Oqaatsivut taakku suli attappavut.

Inatsisissatut siunnersuut suliarylugu ataatsimiititaliami sulinermi nalilersugassarpassuit tikinneqarsimapput. Tamanna aamma siullermeernerani pisariaqassasoq Siumup oqariartuutigaa. Siumup maluginiarpa, suliffeqarfissuit peqarluareersut inuiaqatigiinnut imaannaanngitsorujussuarnik pillugit oqaasertalersuiniarsarinerit ingerlasut, aammalu tupinnanngitsumik aalassassimaarutaasut maluginiarparput. Siumumiillu pingaaruteqartissimaqaарput ernumasaarinerit annertuut imaluunniit illuatungiliuttut inatsisissami siunnersuutigineqartumiit pitsaanerusumik siunnersuutissaqartarnissaat. Inuiaqatigiinnulli kalaallinut aalisartorpassuarnullu pitsaanerulersitsiniaermik takussutissamik tigusaqarsimanngilagut, illuatungaanili inuit ataasiakkaat suliffeqarfiilluunniit ataasiakkaat kisimik nukitorsarneqarnissaat kisimi siunnersuutiginiarneqartarsimagaluarluni, sinerissap qanittuani aalisartunik pitsaanerulersitsinngitsumik. Taamaattumik Siumup aalisartut illorsorlugit ersarissumik inisisimanini matumuuna qimassimannngilluinnaraa naqissusissavarput.

Oqallinnerit aammalu isummersornerit ataqqivagut aammalu avatangiisigut naalaqqissaarlugit aaqqiissutissat suliarisarpagut. Manngertiinnarluta Siumumi sulineq ajoratta. Taamaattorli oqallinnerni taamaassorinninnermik tunngavillit piunnaarlutigit piviusumik oqallinnissaq Siumumiit pingaartipparput.

Maanna isumaliusissiissut saatsinniittooq, inatsisissatut siunnersuutip siullermeerneqarneraniit arlalitsigut aaqqiissutissanik pitsanngoriaatissanillu tikkuussivoq. Taakkulu ilaat uani oqaasertalilaassavakka:

Siumumit maluginiarparput sinerissap qanittuani aalisartunut periarfissiissuteqarnerulernissaq kiffaanngissuseqarnerulernissarlu pingaaruteqarluinnarluni inisisimasoq qarsupeqqajaaneqarluni suliffissuit peqarluareersut nakkutarineqarnerusimasut aamma ikaarsaariarnermi Royal Greenlandimut atugassarititaasussat annertuumik naleqqussaaffigineqartariaqartut.



Periarfissaq manna iluatsillugu Siumumiit oqaatigissavarput Royal Greenland-ip ukumoortumik angusai akuersaanngilluinnaratsigit aammalu Naalakkersuisunut ersarissumik piumasarigatsigu ingerlatseqatigiiffissuup ilorraap tungaanut aallarnissaa siunertaralugu Siuttoqarnikkut torersaasoqassasoq aammalu allaffeqarfissuup Danmark-imiittup piaernerpaamik matuneqarnissaa piumasarigatsigu. Nunarsuatsinnilu niuernikkut torallaannginnerup malitsigisaanik niuernerluttortai kinguneqartitsiviusumik torersarneqassasut. Innuttaasut aammalu aalisartorpassuit ilaqtariippassuillu nammatassinneqarnissaat pinngitsoortinniarlugu aaliangigassat pisariallit Naalakkersuisut iliuuseqarfingissagaat Siumut naatsorsuutigilluinnarpaa.

Siumumiilli pingaarutilerujussuuvooq erseqqissassallugu sinerissap qanittuani aalisartut tunitsivissaarullugit imaluunniit sulisartut kalaallit eqqornerlunneqaratik inissinnissaat. Taamaattumik inatsisisami siunnersuummi Royal Greenland pisussaaffeqarnera aammalu ikaarsaariarfearluni pisariaqarpoq tamatsinnut toqqisisimanissaq pisariaqarmat. Sinerissami aalisartut suleqatigalugit piginneqatigalugillu ingerlatsinerit inerisartariaqartut Siumut isumaqarpoq. Soorlu avanersuarmi, Kullorsuarmi, Nuussuarmi Nutaarmiunilu periarfissat ineriartortinneqaqqittariaqartut. Aamma Siumup qularutigingila, siunissami sinerissap qanittuani aalisartut aningaasarsiornerulersinnaanngornissaasa ilutigisaanik, ingerlatsivippassuit taakkunannga ingerlanneqalersimassasut. Ikaarsaariarnermili Royal Greenlandip immikkut atugassaqarnissa Siumup avaqqunneqarsinnaanngitsutut isigaa, taamaattoq piffissap ingerlanerani allatuulli atugassaqalernissa angutserneqassaaq.

Ataatsimiitaliami tikkuarneqartut ilaat aamma Siumumit iluarismaarparput, tassalu ullumikkut aalisagartassat EU-mut atugassanngortinneqartartut siunissami kalaallinut atugassanngortinneqarnissaanik Naalakkersuisut sulissuteqarnissaanik piumaffigineqartariaqartut Siumut isumaqarpoq. Siumut isumaqarpoq, aalisakkat pineqartut nalingi EU-mit aningaasaliissutigineqartartuningaannit nalitunerujussuusut aamma uagut nammineq iluaqutiginiarnerullugit ingerlatsisariaqalersugut.

Aqutsiveqarfik 47 annertuumik oqallisigineqartoq Siumup maluginiarpaa, pingarsimavorlu aqutsiveqarfik ullumikkut pissuseq malillugu pingasunut aggulunneqarsimalluni ingerlatsivigineqarnissaa. Taannaavorlu ullumikkut paggatassiissutinik aalisartut PNNP-mut piumassutsiminnik ikaarsaariarnissaminut periarfissaqarfingeqqaagassaat.

Aalisarnerup toqqaannaq nunatsinnut aningaasarsiorfiunerulernissaanik anguniagaqaratta, avaqqussinnaanngilarput assinganik ilinniarfinnik pilersitsinissarput. Siumut isumaqarpoq, tunisassiatta pitsaassutsimikkut qaffassarneqarnissaat siunertaralugu ilinniarfimmik pisariaqartitsinerput annertusoq, tamannalu pimoorullugu naalakkersuinikkut naammassiniarlugu



aallartittariaqartugut. Siumut isumaqarpoq Islandimi Grindavikimi ilinniarfik isumassarsorfissatsialaasoq, assingusumillu pilersitsinissarpot Siumup nukinginnartutut isigaa.

Ataatsimiititaliap sulinerani Siumup maluginiarpaattaaq, ukiumut pisassat pinngitsooratik qaqlinneqartartussat 85 %-timut inississimanerat arlalitsigut eqqarsarnartoqartoq, tassami aalisartunut ukiut ilaanni ingerlalluannginnerusinnaasunut eqqornerluisinnaammat. Taamaattumik ataatsimiititaliaq piumasaqarpoq, killiliussap 75 %-timmut appatinneqarnissaa Naalakkersuisut isumagissagaat.

Nunami suliffissat eqqarsaatigalugit, suliffissuit ajunngitsumik ingerlanissaat qulakkiissallugu Siumumut pingaaruteqarpoq. Taamaattumik nunamut tulaassassat 25 %-timit 30 %-timut qaffanneqarnerat isumaqarpugut ajunngitsumik naaperiaanerusoq, suliffissuaqarnerullu patajaatsumik tunngavisseqqinnissaanut aqqutissiuussissasoq Siumup qularutiginngilaa.

Inatsisartuni siunnersuutip apriilip 11-ani siullermeerneqarnerata kingorna inuiaqatigiinni oqallinneq Siumup malinnaaffigeqqissaarpaa aamma peqqinnartutut, pisariaqartutut, pingaaruteqartutut aqqutissiuisutullu isigalugu. Maluginiarparpullu suliffeqarfissuit uagut inuiaqatigiittut pisuussutsinnik aningaasarsiuteqarnerat iluanaarutaasumik ingerlanneqartoq, tamannalu qujarunnaqaaq. Siumumi pingartilluinnarparput ingerlatseqatigiiffit ikittuinnaat taamatut aalisagaatitsinnik aningaasarsiorluarlutik kisimik ingerlatsissanngitsut. Ingerlatseqatigiiffit ingerlalluartut ineriartortullu amerlanerit pisariaqartippavut. Taamatullu siunnerfeqarnitsinni sinerissap qanittuani aalisartut peqataarusuttut piumassuseqarluartullu Siumumiit maluginiarpavut. Taakkualu periarfissinneqarnissaat piffissanngorpoq. Kiffaanngissuseqalernissaat piffissanngorpoq.

Sinerissap qanittuanut aalisartunut, maanna kiffaanngissuseqarlutik aningaasarsiornissaminnik aallartitsisussanngortussanut, pisortaniit qularnaveeqqusisoqarnissaa pinngitsoorsinnaanngikkippot Siumut isumaqarpoq. Taamaattumik Naalakkersuisut piumasaqarfigiumavagut, ikaarsaariarnermi sinerissap qanittuani aalisartoq ataasiinnarluunniit inissinnerloqqunagu, pisariaqassappat aningaasalersuinissamut qularnaveeqqusoisarnissat pillugit suliniutinik aallartitseqqullugit.

Siumup isumaqarpoq, inatsisissatut siunnersuummi pingaaruteqarluinnartut pingasut pineqartut, tassalu pisuussutit inuiaqatigiit kalaallit pigigaat, avataasiortut pisassaasa siamarneruneqarnissaat aamma sinerissap qanittuani aalisartut, allat assigalugit aningaasarsiornernunissaminnut periarfissinneqassasut.



Sinerissap qanittuani, allatut ajornartumik suliffeqarfissuarnut pituttorneqarlutik aalisarnerminnik ingerlatsilernimasunut immikkut ittumik iliuuseqartariaqalersinnaanerput Siumup piareersimaffigaa. Inatsit siunertani naapertorlugu iluatsissappat tamanna allaqqunneqarsinnaanngitsoq Siumut isumaqarpoq.

Siullermik Siumup naatsorsuutigaa, sinerissap qanittuani aalisartunut bankit aningaasaliinissaminut nalornissuteqarlutik maannamut atukkiumanngittarnerisa kingunerisaanik, aalisartut allatut aaqqiissuteqarsimassagunik tamanna isumaqatigiissuteqarnikkut pisimassasoq.

Isumaqatigiissuteqartarnermut inatsit malinneqarsimassappat, erseqqissumik allassimassaaq suna isumaqatigiissutaanersoq, allanguisinnaanermut periarfissat aamma atorunnaarsitsinermi piumasaqaatit suunersut ilanngullugit. Isumaqatigiissut atuutsinneqarsinnaanngilaq pinngitsaalainertut, sanngiinnerusumik atornerluinertut, sianiinaarinertut imaluunniit paasinerluinikkut atuutsinneqalersimappat.

Aalisartut pineqartut, isumaqatigiissuteqarsimanissamut taariikkakka atuukkaluartut, suliffeqarfissuit ilaannit inissinnerlutsinneqassagaluarpata, Naalakkersuisut allatut aaqqiissuteqarnissamik piareersimasuuteqassasut Siumup naatsorsuuteqarfivai.

SIK-p soraernerussutisiaqarnermut aningaasaateqarfia SISA aningasanik killilimmik peqataasinnaalluni oqariartuuteqarpoq, kisianni tamatta isumaqatigiissutigisinnaavarput killeqaraluarpataluunniit pisariaqartippavut. SIK-mut ilaasortat nunami suliffissuarni aalisarnermilu ingerlatsiffinni assiginngittuni sulisartut ullormut pinngitsoorsinnaanngikkivut Siumut isumaqarpoq. Taamaattumik aaqqissusseqqinnermi sulisartut suliffissaqartuarnissaat Naalakkersuisunit eqqumaffigineqarluassasoq Siumumiit kissaatigaarpuit.

Minnerunngitsumik ikaarsaariarnermi.

Naggataatigut Siumumiit naatsorsuutigilluinparput Inatsisisatut siunnersuutip malitsigisaanik Nalunaarutit pingaarutilerujussuit nutarterneqarnerat aamma tullinnguullugu aallartinneqassasut. Tassalu aalisarsinnaanermut akuersissuteqartarnermut nalunaarut, ukiunik killilersuinermut tunngasut aaqqinnejarlutik kiisalu aqumiut pillugit nalunaarut, taamaasilluni nunaqvissut 90 %-ii alloriarfiginissaanut piaartumik nutarterisoqassasoq aamma tamatuma 100 %-tinngornissaa siunertaralugu sulisoqassasoq.



Siumumiit inatsisissatut siunnersuut pingajussaaneerneqartinnagu ataatsimiisitaliamut ingerlateqqinnejarnissaa kissaatigaarpuit, tassanilu ilaatigut basislinie 3 s̄ømilimiit 12 s̄ømilimut inissinneqarnissaanera pillugu apeqqutit minnerunngitsumillu aningaaseriviit qularnaveeqqusiisinnaanersut imaluunniit arlaatigut aningaasalersuutissanik apeqqutit qulakkeerluarsimanissaat sammineqarnissaat paaseqqissaaneqartariaqartoq Siumumiit isumaqaratta. Tassami sinerissap qanittuani aalisartorpassuit ingerlatseqatigiiffinniit attartortinnejarsimasut kiffaanngissuseqarnissaat toqqisisimanissaallu anguneqartariaqartoq pingaartikkatsigu.

Siumup aalisartut tatigai. Siumup qularutiginngilluinnarpaa, niuerfinnut appakaanissamik periarfissiissut aalisartut atorluarlugu aningaasarsiornerminnut ineriatrornerunissaminnullu nukittorsaatigiumaaraat.

Karl Tobiassen

Siumut